

南北史合注

欽定四庫全書

南北史合注卷九十一

明 李清 撰

北史五

丁攸獻文皇帝孫彭城王勰第三子  
有魯陽翼衛之勲封敬宗武城縣  
開國公幼侍孝明書於禁中及長丰神秀慧為孝明親

侍孝昌二年八月進封長樂王歷侍中中軍將軍以兄

彭城王劭事轉為衛將軍左光祿大夫中書監實出也  
武泰元年二月孝武崩大都督尔朱榮謀廢立以王家  
有忠勲且無人望陰與王通率眾來赴夏四月丙申王  
與兄弟夜北度河會榮於河陽

永安元年夏四月戊戌王南濟河即皇帝位封皇兄彭  
城王劭為無上王皇弟霸城公子正為始平王以尔朱  
榮為使持節侍中都督中外諸軍事大將軍尚書令領  
軍將軍領左右封太原王己亥百寮相率奉璽綬備法

駕奉迎於河梁西至陶渚榮以兵權在已且聽費穆計  
遂有異志乃害靈太后及幼主次害無上王劼始平王  
子正又害丞相高陽王雍已下司空元欽儀同三司義  
陽王畧王公卿士二千八列騎衛帝遷於便幕榮尋悔  
稽顙謝罪辛丑車駕入宮御太極殿大赦改武泰為建  
義元年

魏書載辛丑詔曰太祖龍飛燕代累世重光豈圖多  
難遘茲百六致使妖悖四起內外競侵朝無恤政之

臣野有怨酷之士實由女主專政致茲顛覆孝明皇帝冲順隱忍奄棄萬國衆用疑焉苟求胡出入守神器凡厥有心莫不解體太原王榮赴義晉陽大會河洛推翼眇躬應茲大命如涉淵海罔知所濟可大赦天下改武泰為建義元年從太原王督將軍士普加五階在京文官兩階武官三級復天下租役三年壬寅榮表請追謚無上王為皇帝餘死河陰者諸王刺史贈三司三品者令僕五品者刺史七品已下及庶人

郡鎮諸死者子孫聽立後授封爵詔從之癸卯以前太尉江陽王繼為太師以司州牧相州刺史北海王顥為太傅開府仍刺史封光祿大夫清泉縣侯李延實為陽平王位太保遷太傅以并州刺史元大穆為太尉封上黨以儀同三司楊椿為司徒以儀同三司頓丘郡公穆紹為司空領尚書令進爵為王以雍州刺史長孫稚為開府儀同三司進封馮翊王以殿中尚書元謨為東海王甲辰封敷城王坦為咸陽王諫議大夫元貴平為東

海王直閣將軍元肅為魯郡王秘書郎中元曷為長廣  
王以馮翊郡公源紹景復先爵隴西王扶風郡公馮同  
東郡公陸子彰北平公長孫悅並復先王爵以北平王  
超還復為安定王丁未詔中外解嚴戍封大將軍介  
朱榮次子義羅為梁郡王詔柔然主阿那瓌讚拜不名  
上書不稱臣是月汝南王悅北海王顥臨淮王彧前後  
奔梁五月丁巳朔加大將軍介朱榮北道大行臺以右  
僕射元羅為東道大使光祿勳元欣副之循方黜陟先

行後聞辛酉大將軍介朱榮遷晉陽帝餞於却陰丙寅  
詔親理寃獄

冊府元龜載詔曰孝昌之季法令昏惑懷忠守素墮  
隔莫伸深怨夙憾控告靡所其有事在通途橫被疑  
異名例無爽枉見排抑或選舉不平或賦役煩苛諸  
如此類不可具記具有訴人經公車注不合者悉集  
華林東門朕當親理寃獄以伸積滯是月立介朱  
榮女先嬪于孝明者為皇后魏收以後為高歡所納



故隱之宜補書

丁亥朔追封皇兄真定縣公子真為陳留王癸卯以高  
昌王世子光為平西將軍瓜州刺史襲爵秦臨縣伯高  
昌王帝以寇難未夷避正殿責躬撤膳又班募格收集  
忠勇有正言直諫之士集華林園面論時事幽州平北  
府主簿河間邢杲率河北流移人萬餘戶反於北海自  
署漢年號天統

魏書載夏六月辛亥詔曰朕當親御六戎掃靜燕代

太原王介朱榮率精甲十萬為左軍上黨王天穆總  
衆八萬為前軍司徒公楊椿勒兵十萬為右軍司空  
公穆紹通率八萬為後軍

秋七月己丑加大將軍介朱榮柱國大將軍錄尚書事  
壬子光州人劉舉聚衆反於濮陽自稱皇武大將是月  
高平鎮人万俟醜奴僭稱大位臨淮王彧自江南還朝  
八月太山太守羊侃據郡反甲辰詔大都督宗珍孫等  
討劉舉平之九月己巳封齊州刺史元欣為沛郡王壬

申柱國大將軍朱榮率騎七千討葛榮於澄口破擒之莫定滄瀛殷五州平己亥以葛榮平大赦改元為永安辛巳以朱榮為大丞相進榮子平昌郡公文殊昌樂郡公文暢爵並為王以司徒楊椿為太保城陽王徽為司徒冬十月丁亥朱榮檻送葛榮於京師帝臨閭闔門榮稽顙謝罪斬於都市戊戌加朱榮太師壬子江陽王繼薨癸丑復膠東縣侯李侃希祖爵南郡王是月大都督費穆大破梁軍擒其將曹義宗檻送京師梁以

北海王顥為魏主年號孝基入據南兗之鉅城十一月  
戊子以無上王世子韶為彭城王陳留王子寬為陳留  
王寬弟剛為浮陽王剛弟質為林慮王癸亥行臺于暉  
等大破羊侃於瑕丘侃奔梁戊寅封前將軍元凝為安  
東王是歲葛榮餘黨韓樓復據幽州反  
二年春二月甲午追尊皇考為文穆皇帝廟號肅祖皇  
妣為文穆皇后

伽藍記曰是年二月平等寺金像復汗五月北海王

顓入洛

夏四月癸未遷文穆皇帝及文穆皇后神主於太廟百  
寮普加一級降畿內死罪以下刑庚子詔太原王介朱  
榮下將士並汎加二級辛丑上党王天穆大破邢果於  
濟南果降送於京師斬於都市五月壬子朔元顓剋梁  
國乙丑内外戒嚴癸酉顓陷滎陽甲戌夜車駕北巡乙  
亥幸河内丙子顓入洛丁丑進封城陽公元祉為平原  
王安昌縣公元鷲為華山王戊寅太原王介朱榮會車

駕於長子即日反旆上党王天穆北度會車駕於河內  
六月己丑儀同三司費穆伏誅元顥殺之也

此一事乃予增入志快也

秋七月戊辰都督介朱榮賀拔勝從硤石夜濟破顥子  
冠受及安豐王延明軍顥敗走庚午車駕入居華林園  
升大夏門大赦壬申以柱國大將軍太原王介朱榮為  
天柱大將軍癸酉臨潁縣卒江豐斬顥傳首京師甲戌  
以大將軍上党王天穆為太宰以司徒城陽王徽為大

司馬太尉

魏書載山亥帝宴勞天柱大將軍公朱榮上党王天  
穆及北來督將於都亭出宮人三百繒錦雜綵數萬  
匹班賜有差又諸州郡遣使奉表行宮者並加一大  
階丁丑獲顓弟瑱斬之追奪受顓爵賞官級者

己卯以南青州刺史元旭為襄城王南兗州刺史元暹  
為汝陽王閏月辛巳帝始居宮內辛卯以無吏部尚書  
陽津為司空八月己未以太傅李延實為司徒丁卯封

瓜州刺史元太榮為東陽王九月大都督侯深破韓樓  
於薊斬之幽州平冬十月己酉朔日有蝕之丁丑以前  
司空丹陽王蕭贊為司徒十一月己卯就德興自榮州  
遣使請降丙午以大司馬太尉城陽王徽為太保以司  
徒丹陽王蕭贊為太尉以雍州刺史長孫承業為司徒  
是歲梁中大通元年

三年

魏書靈徵志載是年二月民家有二銅像一顯下生



欽定四庫全書

卷九十一

白毫四一頰傍生黑毛一

夏四月丁卯雍州刺史余朱天光討万侯醜奴蕭寶夤  
於安破擒之囚送京師甲戌以關中平大赦斬醜奴於  
都市賜寶夤死六月戊午噉噉國獻獅子一詔故胡太  
后親屬受爵於朝者皆黜為民

魏書靈徵志曰是月甲子申時辰地有青氣廣四尺  
東頭緣山西北引至天半止西北戌地有黑赤黃雲  
如山峰頭有青氣廣四尺許東南引至天半二氣相

接東南氣先散西北氣後滅亦帝幽崩之徵

是月白馬龍涸胡王慶雲僭稱帝號於永洛城秋七月  
丙子尔朱天光平永洛城擒慶雲

伽藍記曰是年七月平等寺金像復汗每經神驗人  
皆惶懼至二月尔朱兆入洛

九月辛卯天柱大將軍尔朱榮上党王天穆自晉陽來  
朝戊戌帝誅榮天穆於明光殿及榮子菩提乃升閭闔  
門大赦

魏書載詔曰天道忌盈人倫嫉惡呂霍之門禍譴所  
伏梁董之家咎徵斯在頃孝昌之末天步孔艱女主  
亂政監國無主介朱榮爰自晉陽同憂王室義旗之  
建大會盟津舉世樂推共成鴻業論其始圖非無勞  
效曾未崇朝豺聲已露河陰之後安忍無親王公卿  
士一朝塗地宗戚靡遺內外俱盡假弄天威始危神  
器時事倉卒未遑問罪尋以葛賊橫行馬首南向捨  
過責成用平醜鹵及元顥問鼎大駕北巡復致勤王

展力行所以此論功且可補過既位極宰衡地踰齊  
魯心如猛火山林無以供其暴意等漏卮江河無以  
充其溢既見金革稍寧方隅漸泰不推天功專為己  
力與奪任情臧否肆意無君之跡日月以甚拔髮數  
罪益不足稱斬竹書愆豈云能盡方復託名朝宗陰  
圖讐逆睥睨天居窺覲聖厯乃有裂冠毀冕之心將  
為拔本塞源之事天既厭亂人亦悔禍同惡之臣密  
來投告將而必誅罪無容捨又元天穆宗室未屬名

望素微遭逢際會頗參義舉不能竭其忠誠以奉家  
國乃復棄本逐末背同即異為之謀主成彼禍心是  
而可忍孰不可忍並以伏辜自貽伊戚元惡既除神  
人慶泰可大赦天下

遣武衛將軍奚毅前燕州刺史侯深率衆鎮北中城是  
夜左僕射尔朱世隆榮妻鄉郡長公主率榮部曲自西  
陽門出屯河陰己亥攻河橋禽毅等屠害之據北中城  
南逼京師以雍州刺史尔朱天光為侍中儀同三司冬

十月癸卯朔封大鴻臚卿竇炬為南陽王汝南縣公脩  
為平陽王新陽伯誕為昌樂王復琅邪縣公李叔仁官  
爵仍為大都督以討世隆甲辰徙封魏郡王譔為趙郡  
王譔弟子趙郡王寔為平熙王戊申皇子生大赦己卯  
通直散騎常侍李苗以火船焚河橋尔朱世隆退走丁  
卯詔以世隆北叛河内固守其在督將文武普加二級  
兵士給復三年壬申世隆停建興之高都尔朱兆自晉  
陽來會之共推長廣王昇即偽位大赦所部年號建明

徐州刺史介朱仲遠反率衆向京師十一月癸酉以車  
騎將軍鄭先護為大都督與行臺楊昱共討之乙亥以  
司徒長孫稚為太尉臨淮王彧為司徒丙子進雍州刺  
史廣宗郡公介朱天光爵為王

魏書曰丁丑介朱仲遠陷西兗州執刺史王衍癸未  
以右衛將軍賀拔岳為東征都督壬辰又以大都督  
鄭先護兼尚書左僕射為行臺與勝共討仲遠庚子  
勝與仲遠戰於滑臺失利遂奔梁十二月壬寅介朱

北寇丹谷將軍崔伯鳳戰沒楊文義史作龍降大都  
督源子恭奔退

靈徵志曰是月己丑有赤氣如霧從顯陽殿西南角  
斜屬步廊高一丈許連地如絳紗幔自未至戌不滅  
帝惡之

十二月甲辰尔朱兆尔朱度律自富平津上率騎涉度  
以襲京城事出倉卒禁衛不守帝步出雲龍門兆逼帝  
幸永寧寺殺皇子亂兵殺司徒臨淮王或左僕射范陽



王誨戊申，朱度律自鎮京師。甲寅，朱光遷帝於晉陽。甲子，弒帝崩于城內三級佛寺。

伽藍記曰：朱光縊帝於三級寺，臨終禮佛，願不為國王。又作五言曰：權去生道促，憂來死路長。懷恨出國門，懷悲入鬼鄉。隧門一時閉，幽庭豈復光。思鳥吟青松，悲風吹白楊。昔來聞死苦，何來身自當。及葬所作五言詩，即為挽歌。朝野悲慟，百姓皆掩涕。

時年二十四。并害陳留王寬。中興二年，廢帝奉諡曰武

懷皇帝及孝武立又以皇考廟諱改謚孝莊皇帝廟號  
敬宗永熙元年冬葬靜陵

節閔皇帝

魏書稱前廢帝

諱恭字脩業獻文皇帝孫廣陵惠王羽之子母王妃帝  
少有志度事祖母嫡母以孝聞

魏書禮志曰恭與北海王顥同為庶祖母喪恭治重  
居廬顥齋居堊室而已

正始中襲爵歷給事黃門侍郎王以元義擅權托稱瘡  
病絕言垂一紀居於龍花佛寺無所交通永安末有白  
孝莊言王不語將有異圖人間游聲又云常有天子氣  
王懼禍遂逃匿上洛尋見追躡送京師拘禁多日以無  
狀獲免

伽藍記曰莊帝疑王詐夜遣人盜掠衣物拔刀劍欲  
殺之王張口以手拈舌竟不言帝信其真遂放歸第  
及孝莊遇弒尔朱世隆等以元曷疎遠又非人望所推

以王潛默晦身有過人之量將謀廢立恐實不語乃令  
王所親申意無迫脅王曰天何言哉世隆大悅及元  
至邛南

冊府元龜曰介朱世隆等奉表勸進王曰自量眇身  
是以執讓今敬承所陳惟愧弗克負荷耳

世隆等乃奉王東郭外行禪讓禮

伽藍記載曇禪詔有曰王往以運屬殷憂卷懷積載  
囊括有年今天眷明德歷數允集乃徐發樞機副茲

竈屬

太尉介朱度律奉輅車進璽紱王服袞冕百官侍衛入  
自建春雲龍門

普泰元年春二月己巳皇帝即位於太極殿前羣臣拜  
賀禮畢遂登闕闔門大赦

伽藍記曰黃門侍郎邢邵為赦文叙莊帝枉殺介朱  
榮狀帝曰永安手剪強臣非為失德直以天未厭亂  
故逢成濟之禍耳赦文直言門下朕以寡德運屬樂

推思與兆庶同茲大慶肆眚之科一依常式時海內  
庶士咸稱聖君

以魏為大魏改建明二年為普泰元年罷稅市及稅鹽  
之官庚午詔曰自秦之末競為皇帝忘負乘之深殃垂  
貪鄙於萬葉予今稱帝已為褒矣可普告令知是月鎮  
遠將軍崔祖螭聚青州七郡之衆圍東陽幽州刺史劉  
靈助起兵於薊河北大使高乾及其弟昂夜襲薊州執  
刺史元寔共推前河內太守封隆之行州事三月癸酉

封長廣王粦為東海王以青州刺史魯郡王肅為太師  
沛郡王欣為太傅司州牧改封淮陽王以徐州刺史彭  
城王尒朱仲遠雍州刺史隴西王尒朱天光並為大將  
軍以柱國大將軍并州刺史潁川王尒朱兆為天柱大  
將軍

愚按節閔曾立兆女為皇后魏收以其為高歡所納  
故隱而不書合補

封晉州刺史平陽郡公高歡為渤海王以特進清河王

賈為太傅以尚書令樂平王劼朱世隆為太保以趙郡王諶為司空丙申定州刺史侯深破劉靈助於安國城斬之傳首京師夏四月癸卯帝幸華林都亭燕射班賜有差

冊府元龜曰太樂奏伎有倡優為愚癡者帝以其非雅戲詔罷之

壬子享太廟

魏書靈徵志曰是月甲寅有龍迹自宣陽門西出復



入城乙卯羣臣入賀帝曰國將興聽於民將亡聽於神但當君臣上下克己為治未可恃此為慶

癸亥隴西王尒朱天光破宿勒明達擒送京師斬之丙寅以侍中尒朱彥伯為司徒詔有司不得復稱偽梁罷細作之條無禁隣國還往五月丙子尒朱仲遠使其都督魏僧勗等討崔祖螭於東陽斬之六月己亥朔日有蝕之庚申渤海王高歡起兵信都以誅尒朱氏為名癸亥帝臨顯陽殿親理冤訟秋七月壬申尒朱世隆等害

前太保楊椿前司空楊津丙戌司徒介朱彥伯以早遜  
位八月丙午介朱度律介朱仲遠等出禦高歡九月以  
彭城王介朱仲遠為太宰庚戌以隴西王介朱天光為  
大司馬癸巳追尊皇考為先帝皇妣為先皇妃封皇弟  
永業為高密王皇子子恕為渤海王冬十月壬寅高歡  
推北海太守元朗僭位於信都

伽藍記曰是年歸覺寺金像生毛眉髮皆具明年帝  
以廢崩

二年春二月高歡敗尔朱天光等於韓陵夏四月辛巳高歡與元朗至芒山使魏蘭根慰喻洛邑且觀帝為人蘭根忌帝雅德

伽藍記曰孝莊初遣安東將軍楊大義平北將軍史忸龍各領兵三千守太行嶺率眾先降尔朱兆故兆得乘勝入洛陽己尔朱世隆論二人功各封千户帝曰於王有功於國無勲不許尔朱仲遠鎮滑臺表用其下都督為西兗州刺史先用後表詔答曰己能近

補何勞遠聞介朱天光滅万俟醜奴獲波斯所獻獅  
送洛陽帝曰禽獸囚之則違其性命送歸其國使者  
以道遠殺諸路而返有司劾其違旨帝曰豈可以獸  
罪人遂赦之世隆侍宴帝每言太原王貪天功為已  
力罪亦合死世隆等愕然

還致毀謗竟從崔陵議廢帝於崇訓佛寺立平陽王脩  
是為孝武帝帝既失位乃賦詩曰朱門久可患紫極非  
情翫顛覆立可待一年三易換時運正如此惟有脩真

觀五月丙申孝武酖弑帝崩於門下外省時年三十五  
孝武詔百司赴會葬用王禮加九旒鑾輅黃屋左纛班  
劍百二十人後西魏追謚節閔皇帝

孝武皇帝

魏書曰出帝

諱修字孝則孝文皇帝孫廣平武穆王懷第三子生母  
李氏帝性沉厚學涉好武事遍體有鱗文年十八封汝  
陽縣公夢人有從諱謂已曰汝當大貴得二十五年永

安三年封平陽王普泰中為侍中尚書左僕射中興二  
年高歡既敗尔朱氏元朗自以疎遠請遜大位歡乃與  
百寮議以孝文不可無後時召汝南王悅於梁至將立  
之宿昔而止又諸王皆逃匿王在田舍先是嵩山道士  
潘彌望見洛陽城西有天子氣候之乃王也於是造第  
密言之居五旬歡使斛斯椿求王椿從王所親王思政  
見王王愛色曰非賣我耶椿遂以白歡歡遣四百騎奉  
迎王入氍帳陳誠泣下需襟王讓以寡德歡再拜王亦

拜歡出備服御進湯沐連夜嚴警昧爽文武執鞭以朝  
使斛斯椿奉勸進表椿入帷門螫折延首而不敢前王  
令思政取表曰視之便不得不稱朕矣於是假朗詔策  
而禪位焉遂即位於東郭之外用代都舊制以黑氍毹  
七人歡居其一帝於氍毹上西向拜天訖自東陽雲龍門  
入

永熙元年夏四月戊子皇帝御太極前殿羣臣朝賀禮  
畢升閭闔門大赦改中興二年為太昌元年

冊府元龜載詔曰上天降禍運際多難赫赫宗周剪  
為戎寇肅肅清廟將成茂草胡羯乘機肆其昏虐殺  
君害主剗剔海內大丞相渤海王高歡爰舉義旗志  
雪國恥廣門之軍貔虎奪氣鄴下之師金湯失險近  
者四胡相率實繁有徒驅天下之兵盡華戎之銳枹  
鼓暫交一朝盪滅元兇授首大憝斯擒揚旆濟河掃  
清伊洛士民安堵不失舊章社稷危而復安鴻基毀  
而復構朕猥當樂推承茲大業若涉淵氷罔識攸濟



可大赦天下

士辰高歡還鄴車駕餞於乾脯山五月丙申弒節閔帝以太傅淮陽王欣為太師改封沛郡王以司徒趙郡王諶為太保以司空南陽王寶炬為太尉以太保長孫承業為太傅辛丑復前司空高乾位

魏書己巳帝幸華林都亭宴羣臣班賚有差羽林隊主唐猛突入稱慶帝以猛犯禁衛杖之猛辭色有忤斬之階下丁未詔賑孤老疾病無所依歸者

已酉以儀同三司清河王亶為司徒

魏書載庚戌詔曰頃西土年饑百姓流徙或身倚溝渠或命懸道路皆見棄草土取厭為言念於茲有警夜寐掩骼之禮誠所庶幾其諸有露屍令所在掩覆可宣告天下

乙卯內外解嚴六月癸亥朔帝於華林園納訟丁卯南陽王寶炬坐事降為驃騎大將軍以王歸第戊寅詔諸受建明普泰中封爵汎級優待之階悉追乙卯臨顯陽

殿納訟丙戌詔曰間者凶權誕恣法令變常遂立夷貊  
輕賦與收天下之意隨以箕歛之重終納十倍之征掩  
目捕雀何能過此今歲租調且兩收一丐明年復舊秋  
七月

魏書載己未詔曰頃永安馭運載育皇儲遂錫汎階  
以申國慶近經普泰便爾中追今罪人既殄舊章斯  
復宜述往旨用卒前恩皇子汎階一級悉可還授文  
穆廟汎故宜停寢已受者依例追之

庚子以南陽王寶炬為太尉壬寅渤海王高歡率衆討  
尔朱兆乙丑斬尔朱天光于都市庚戌尔朱兆大掠晉  
陽北走秀容并州平乙卯帝臨顯陽殿親理冤獄是月  
東南大行臺樊子鵠大破梁軍于譙城擒其鄴王元樹  
八月壬戌朔高澄來朝燕射班賚部下各有差丁卯封  
西中郎將元寧為高平王九月庚子帝幸華林都亭引  
見元樹及公卿百寮及蕃使督將等宴射班賚各有差  
癸卯進燕郡公賀允爵為王乙巳帝幸都水南過洛汭

遂至瀍澗己酉復獵於北原癸丑改封沛郡王欣為廣陵王節閔子渤海王子恕為沛郡王己卯帝謁山陵冬十月辛酉朔日有蝕之十一月丁酉祀圓丘戊戌朝會百官於太極前殿甲辰弒安定王朗及東海王粲己酉以汝南王悅為侍中大司馬開府葬太后胡氏十二月丁亥害大司馬汝南王悅大赦改元為永興以同明元時年號尋改為永熙是歲柔然嚙噠高麗契丹庫莫奚高昌等國並遣使朝貢

二年春正月庚寅朝饗羣臣於太極前殿丁酉渤海王  
高歡大敗尔朱兆於赤洪嶺兆自殺山東平罷諸行臺  
己亥車駕幸嵩高石窟靈巖寺庚子又幸散施各有差  
丁亥追尊皇考為武穆皇帝太妃馮氏為武穆皇后皇  
妣李氏為皇太妃二月以咸陽王坦為司空辛卯阿至  
羅十萬戶內附詔復以渤海王高歡為大行臺隨機裁  
處甲午魯郡王肅薨丁巳以趙郡王湛為太尉以太尉  
南陽王寶炬為尚書令太尉開府夏四月己未朔日有

蝕之

魏書天象志占曰在丙虧從正南起君陰謀 明朱  
鎬史糾云按日食者陽消陰長之機君弱臣強之象  
高歡脅君出奔辰弗集房天象昭然不曰臣有逆節  
翻曰君有陰謀何耶

庚寅詔諸幽枉未申事經一周以上悉集華林將親察  
覽秋七月壬辰以太師廣陵王欣為大司馬以太尉趙  
郡王諶為太師並開府庚戌以前司徒燕郡王賀拔允

為太尉八月己丑高澄來朝帝宴於華林都亭班賚部下各有差戍長車駕餞澄于河梁仍濟河而返冬十月癸未以衛將軍瓜州刺史泰臨縣伯高昌王趙子堅為儀同三司進爵郡公十二月丁巳車駕狩於嵩陽士卒寒苦己巳遂辛溫湯丁丑還宮

三年春二月壬戌大赦丙子帝親釋奠禮先師辛巳辛洪池波遂遊田壬午封左衛將軍元斌之為潁川王

魏書靈徵志載是月永寧寺九層佛圖災 伽藍記



曰帝登凌雲臺望火當時雷雨晦冥雜下霰雪百姓道俗咸來觀火悲哀之聲震動京邑火經三月不滅

夏四月癸丑朔日有蝕之辛未高平王寧坐事降爵為公五月丙戌置勲府庶子箱別六百人騎官箱別二百人閤內部曲數千人帝內園高歡乃以斛斯椿為領軍使與王思政等統之以為心膂軍謀朝政咸決於椿分置督將及河南關西諸刺史辛卯詔戒嚴

魏書曰帝為斛斯椿元毗等間阻二於齊獻武王托

征蕭衍盛署徵發河南諸州兵天下怪惡之愚按  
孝武惡高歡專政故密謀討之且以君伐臣奚怪惡  
之有收黨齊毀魏大率類此

揚聲伐梁實謀北討

魏書載詔曰大魏得一居宸秉六御寓而勾吳負險  
久遺度外世祖太武皇帝握金鏡以照耀擊玉鼓以  
鏗鏘長江已北盡為魏土頃天步中圯國綱時屯凶  
豎乘機牙窺上國疆場侵噬州郡淪胥自非五牛警

旆七萃按部何以復文武之舊業拯塗炭於遺黎朕  
將親總六軍經臨彭汴一勞永逸庶保無疆內外百寮  
便可嚴備出頻之期更聽後敕 丁酉帝幸華林都  
亭集京畿都督及軍士三千餘人慰勉之 魏書載  
夏六月丙子詔曰頃年以來六步時阻干戈不輯或  
徇節感恩奮不顧命或臨戎對敵赴難如歸身首橫  
分骸骨不歛勲誠靡錄榮贈莫加寤寐矜之良可悼  
嘆可普告內外所在言列若無親近聽故友陳之尚

檢實隨狀科贈庶幾慰冤魂少申惻隱

秋七月己丑帝親總六軍十餘萬次河橋高歡引軍東  
度丙午帝率南陽王寶炬清河王亶廣陽王湛斛斯椿  
以五千騎宿於瀍西陽王別舍沙門都維那惠臻負璽  
持千牛刀以從有牛百頭盡殺以食軍士衆知帝將出  
其夜亡者過半清河廣陽二王亦逃歸畧陽公宇文泰  
遣都督駱超李賢和各領兵數百騎來赴超先至甲戌  
賢和會帝於嶠中己酉高歡入洛遣婁昭及河南尹元

子思領左右侍官追帝請迴駕高昂率勁騎及帝於陝西帝鞭馬長驚至湖城饑渴甚有王思村人以麥飯壺漿獻帝帝甘之復一村十年是歲二月熒惑入南斗衆星北流羣鼠浮河向鄴梁武跣而下殿以襪星變及聞帝之西慙曰鹵亦應天乎帝至稠桑潼關大都督毛洪賓迎獻食八月宇文泰遣大都督趙貴梁禦帥甲騎三千來赴乃迎帝過河帝謂禦曰此水東流而朕西上若得重謁洛陽廟是卿等功也帝及左右皆流涕泰迎帝

於東陽帝勞之將士皆呼萬歲遂入長安以雍州公廨  
為宮大赦進字大泰為洛陽郡公尋拜大丞相甲寅高  
歡推司徒清河王亶為大司馬承制總萬幾居尚書省  
歡追車駕至潼關

魏書載秋八月戊辰清河王制曰姬祚中微踐土有  
從王之後劉氏將傾北軍致左袒之舉用能隆茲遠  
年克此卜世永熙之季權佞擅朝羣小是宗勲賢見  
害大丞相興甲汾川問罪伊洛羣奸畏威擁迫人主

以自蔽衛遠出秦方雖車駕流移未即返御然權倖  
將除天下延頸魏邦雖舊其化維新思與兆民同茲  
更始可大赦天下

九月己酉歡東還洛陽帝親督衆攻潼關斬其行臺華  
長瑜又剋華州其冬十月高歡推清河王亶子善見為  
主徙都鄴是為東魏魏於此始分為二閏十二月癸巳  
宇文泰酖帝崩初帝之在洛從妹不嫁者三一平原公  
主明月南陽王同產二安德公主清河王懌女三蒺藜

亦封公主帝內宴令諸婦人詠詩或詠鮑照樂府曰朱  
門九重門九閨願逐明月入君懷帝既以明月入闕疾  
慕自縊宇文泰使元氏諸王取明月殺之帝不悅或時  
彎弓或時推案君臣由此不安平及遇弒之日潘彌奏  
言今日當甚有急兵其夜帝在逍遙園宴阿至羅顧侍  
臣曰此處彷彿華林園使人聊增悲怨命取所乘波斯  
騾馬使南陽王寶炬躍之將攀鞍蹶而死帝惡之日晏  
還宮至後門馬驚不前鞭打入謂潘彌曰今日幸無他



否彌曰過夜半則大吉須臾帝飲酒為泰所酖崩

愚按孝武入關封宗室臨淄縣子立為陳留王城陽侯憖為毗平王毗為魏郡王順為濮陽王最為樂平王李海為馮翊王孚為扶風王暢為博陵王融為魏興王仲景為順陽王紀為華山王均為安昌王子孝為義陽王皆宜入本紀而傳內不載其月聊附於此時年二十五謚曰孝武皇帝殯於草堂佛寺資治通鑑曰諫議大夫宋球慟哭嘔血泰以其名儒

不之罪也又曰高歡聞之啟請舉哀制服東魏主使  
羣臣議太學博士潘崇和謂君遇臣不以禮則無反  
服是以商湯民不哭桀周武民不哭紂國子博士衛  
既隆李同軌議高后于永熙離絕未彰宜為之服東  
魏主從之 愚按孝武連弑三君宜有今日所恨者  
負君之宇文泰耳若崇和言固謬高后歡女故既隆  
等以此媚權臣非惓故主也

十餘年乃葬雲陵始宣武孝明間謠曰狐非狐貉非貉

焦梨狗子齧斷索識者以為索謂本索髮焦梨狗子指  
宇文泰俗謂之黑獺也

是歲東魏孝靜帝天平元年

文皇帝諱寶炬孝文皇帝之孫京兆王愉之子母楊妃  
正始初坐父愉罪兄弟皆幽宗正寺及宣武崩乃得雪  
正光中拜直閤將軍時胡太后多嬖寵與孝明帝謀誅  
之事泄免官武泰中封邵縣侯永安三年進封南陽王  
孝武即位拜太尉加侍中永熙二年進太保開府尚書

令三年孝武與高歡構難以王為中軍四面大都督及  
從入關拜太宰錄尚書事孝武崩丞相畧陽公宇文泰  
率羣公卿士奉表勸進三讓乃許焉

大統元年春正月戊申皇帝即位於城西

魏書寶炬輕躁薄行耽淫酒色宇文黑獺既害出帝  
乃僭大號此魏收誣辭且西正東偽魏澹所著魏書  
是也惜不傳

大赦改元追尊皇考為文景皇帝皇妣楊氏為皇后已

西進丞相畧陽公宇文泰都督中外諸軍錄尚書事大  
行臺改封安定郡公以尚書令斛斯椿為太保廣平王  
贊為司徒乙卯立妃乙弗氏為皇后皇子欽為皇太子  
甲子以廣陵王欣為太傅以儀同三司万俟壽樂干為  
司空東魏將侯景攻陷荊州二月前南青州刺史大野  
拔斬兖州刺史樊子鵠以州降東魏夏

丘悅三國典畧載夏四月詔曰逆賊高歡初從尔朱  
榮入洛勸榮篡位罪一孝莊幽辱實歡之由無辭可

反詐為建義罪二廢殺建明罪三廢殺中興罪四廢  
殺普泰罪五廢殺汝南王悅罪六雖尊先帝然實輕凌舉  
兵逼逐罪七先帝嘗使舍人元士弼詣歡論事歡露  
髮袒體見士弼直問何物來士弼曰有敕歡曰何物  
敕取書裂之肆口惡罵罪八毀撤宮廟焚除塔寺戶  
口百萬驅擁北遷死者過半罪九蒸孝莊后逼令為  
尼罪十取普泰后列在私房罪十一改嫁孝武后與  
彭城王韶更相擬以圖廢置罪十二高乾兄弟起義

立勲歡忌其豪傑密令屠殺帝不獲已從之歡見敖  
曹哭稱枉死罪十三凡事賀拔允令看額上有天子  
相否允不敢答由是害之罪十四武衛伊林先帝親  
委歡收斬之罪十五歡上事天柱下承兒侄銜慝餘  
血誓同生死乃背允朱盡加誅滅罪十六從叔自南  
歸國歡忌而殺之罪十七尚書崔孝芬辛雄等國家  
勲舊責以駕行不從一時屠害罪十八永熙中求并  
州城營起臺殿詐云誘賊劉彥升中旨顯抑終不可

停罪十九歡逐先帝後扶清河王璽嫵其長大難制  
復廢之立其幼男猶忌清河尋行醢毒罪二十歡有  
莫大之罪未伏天誅朕將親帥六軍冀行薄伐丞相  
董茲戎律計日殲定 愚按殺建明中興普泰三主  
與汝南王皆孝武猜忌罪不在歡而歡自病逐孝武  
事孝靜甚恭未有恭於子而醢其父者讀綱目書卒  
自明餘或當或甚惟連納二故君后為歡大罪

五月降罪人加安定公宇文泰位柱國秋七月以開府



儀同三司念賢為太尉以司空万俟壽樂干為司徒以  
開府儀同三司越勒肱為司空梁州刺史元羅以州降  
梁九月有司詔煎御香澤須錢萬貫帝以軍旅在外停  
之冬十月太師上党王長孫權薨十二月以太尉念賢  
為太傅以河州刺史梁景獻為太尉是年封崇室琰為

宋安王

二年春正月辛亥祀南郊改以神元皇帝配東魏攻陷  
夏州二月儀同三司段敬討叛羌梁企定平之三月以

梁州刺史李叔仁為司徒以司徒万俟壽樂干為太宰  
夏

費長房歷代三寶記載四月甘露降秋穀不熟

五月司空越勒肱卒秦州刺史建中王万俟普撥及其  
子太宰壽樂干率所部奔東魏秋九月以扶風王孚為  
司空以太保斛斯椿為太傅冬十一月追改始祖神元  
皇帝為太祖道武皇帝為烈祖

愚按道武開基之主宜為太祖配祀南郊孝文所定

是也又帝之改為非

是歲關中大饑人相食死者十七八

三年春二月槐里獲神璽大赦夏四月太傅斛斯椿薨  
五月以廣陵王欣為太宰賀拔允為太師六月以司空  
扶風王孚為太保以太尉梁景獻為大尉以司徒廣平  
王贊為太尉以開府儀同三司王盟為司空冬十月安  
定公宇文泰大破東魏君於沙苑拜泰柱國大將軍十  
二月司徒李叔仁自梁州通使於東魏建昌太守賀蘭

植斬之

四年春正月辛酉拜天於清暉室終帝世遂為常二月  
東魏攻陷南汾潁豫廣四州廢皇后山弗氏三月立柔  
然女郁久閭氏為皇后大赦以司空王盟為司徒秋七  
月東魏將侯景等圍洛陽帝與安定公宇文泰東伐  
令狐德茶周書曰魏帝將如洛陽拜園陵會東魏圍  
獨孤信於洛陽詔太祖率六軍救信帝亦東  
戰不利車駕西還以關中趙青雀作亂留止閩鄉尋討

平之九月帝至自東伐以撫軍將軍梁公定為南洮州  
刺史安西蕃

是歲東魏元象元年

五年春二月赦京城內夏五月以開府儀同三司李弼  
為司空免伎樂雜役之徒皆從編戶秋七月詔自今恒  
以朔望親開京師見禁囚徒以司空扶風王孚為太尉  
冬十月於陽武門外懸鼓置紙筆以求得失

是歲東魏興和元年

六年春正月庚戌朝羣臣自西遷至此禮樂始備太尉  
扶風王孚薨二月賜故后卹弗氏死皇后郁久問氏亦  
尋崩鑄五銖錢降罪人冬十一月太師念賢卒

七年春二月幽州刺史順陽王仲景以罪賜死三月夏  
州刺史劉平謀反大都督于謹討擒之秋八月詔班政  
事之法六條冬十一月叛羗梁公定徙黨屯於赤水城  
秦州刺史獨孤信擊平之尚書奏班十二條制十二月  
帝御憑雲觀引見諸王叙家人禮手詔為宗誡十條賜

之

八年春三月初置六軍夏四月鄯善玉兄鄯朱那率眾  
內附秋八月以太尉王盟為太保冬十月詔皇太子鎮  
河東十二月行幸華州

周書曰魏帝狩於華陰大饗將士太祖率諸將朝於  
行在所

起萬壽殿於沙苑北

九年春正月降罪人禁中外及從母兄弟姊妹為昏閏

月車駕至自華州二月東魏北豫州刺史高仲密據虎  
牢內附以仲密為侍中司徒封渤海郡公秋七月大赦  
以太保王盟為太傅以太尉廣平王贊為司空冬十二  
月以司空李弼為太尉

是歲東魏武定元年

十年春正月甲子詔公卿已下每月上封事三條極言  
得失刺史二千石銅墨已上有讜言嘉謨勿有所諱夏  
五月太師賀拔勝卒秋七月更權衡度量



歷代三寶記曰是年正獄訟寬刑罰廣學業敦禮教  
斷草書去文就質

十一年夏五月太傅王盟卒詔諸鞠大辟獄皆命三公  
覆審然後加刑冬始築圓丘於城南封皇子儉

愚按周書元偉傳內有大將軍梁王元儉疑是文帝  
諸子封國皆一字

十二年春二月涼州刺史宇文仲和反秦州刺史獨孤  
信討平之三月鑄五銖錢夏五月詔女年不滿十三以

上勿得以嫁秋九月冬魏渤海王高歡攻玉壁晉州刺史韋孝寬力戰禦之冬十二月歡焚營而退

十三年春正月開白渠溉田二月詔自今應官刑者直沒官勿刑亡奴婢應黥者止科亡罪以開府儀同三司若于惠為司空東魏渤海王高歡薨其司徒侯景據潁州率河南六州內附授景太傅河南大行臺上谷郡公三月大赦夏五月以太傅侯景為大將軍以開府儀同三司獨孤信為大司馬晉王謹薨秋七月司空若于惠

卒大將軍侯景據豫州叛封皇子寧為趙王

周書曰是年冬太祖奉魏帝西狩岐陽 梁太清元

年

十四年春正月赦潁豫廣北洛陽荆襄等七州以開府  
儀同三司趙貴為司空皇孫生大赦夏五月以安定公  
宇文泰為太師廣陵王歡為太傅太尉李弼為大宗伯  
前太尉趙貴為大司寇以司空于謹為大司空是年封  
皇子廓為齊王

十五年己巳五月梁武帝殂初詔諸代人太和中改姓者並令復舊六月東魏渤海王高澄攻陷潁州秋八月東魏蘭京等殺其渤海王高澄冬十二月封梁雍州刺史史岳陽王肅謦為梁王

歷代三寶記曰是年詔依古禮男女異路

十六年夏四月封皇子儒為燕王公為吳王五月東魏丞相高洋篡位國號齊秋七月詔安定公宇文泰東討至恒農齊師不出乃還九月大赦是年封宗室偉為南

安王

是歲梁簡文帝大寶元年 齊王高洋天保元年  
洋本魏臣也西魏一日猶存當以君道臨齊斥姓斥  
名以此周纂西魏則兩國分尊

十七年春三月庚戌帝崩於乾安殿時年四十五夏四  
月庚辰葬永陵

宋揮塵錄曰乾德四年詔禁樵採又云陵在富平縣  
東南既誤指帝陵為孝文陵恐此所指者又孝武雲

陵之訛也明一統志載二陵甚明

上謚曰文皇帝帝性強果始為太尉時侍中高隆之恃  
渤海王高歡之黨驕狎公卿因公會帝勸酒不飲怒而  
歐之罵曰鎮兵何敢爾也孝武以歡故免帝太尉歸第  
命羽林守衛月餘復位及歡將改葬皇考朝廷追贈太  
師百寮會弔者盡拜帝獨不屈曰安有生三公而拜贈  
太師耶及躋大位權歸周室嘗登逍遙觀望嵯峨山謂  
左右曰望此令人有晚展之意若朕年五十便委政儲

宮尋山餌藥不能一日萬幾也既而大運未終竟保天祿云

愚按魏收魏書不為西魏三帝立紀南史其本之魏澹魏書乎然短簡寂寞若此宜隋煬不以為善而澹書之義例嚴正反不得與收之穢史並傳也

廢帝諱欽文皇帝長子母乙弗后大統元年正月乙卯立為皇太子年七歲文帝以托安定公宇文泰曰是子才由於公不才亦由於公公勉之十七年三月文帝崩

太子即皇帝位大赦立妃宇文氏為皇后是月梁邵陵王蕭綸侵安陸大將軍楊忠討擒之

愚按是年秋七月侯景廢簡文帝立豫章王棟改天正元年十一月侯景僭即皇帝位國號大漢

元年春正月改元始去年號冬十一月梁湘東王蕭繹討侯景擒之遣其舍人來告始嗣位於江陵

二年秋八月大將軍尉遲迥克成都劍南平冬十一月安定公宇文泰殺尚書元烈是年封宗室元定為建城王



三年春正月安定公宇文泰廢帝而立齊王廓置帝雍  
州解舍帝自元烈殺害有怨言密謀誅泰淮安王育廣  
平王贊等並垂淚諫帝不聽故及於辱夏四月史臣柳  
虬執簡告於朝曰廢帝文皇帝嗣子以托安定公又納  
公女為匹公既受茲重寄任居元輔不能訓誨有成致  
令廢黜負文皇帝付屬之意此咎非安定公而誰泰乃  
令太常盧辯作告喻公卿曰嗚呼我羣后暨衆士惟文  
皇帝以襁褓之嗣托於予訓之誨之庶厥有成而予罔

能弗變厥心庸暨乎廢墜我文皇帝之志嗚呼茲  
咎予其焉避予實知之矧爾衆人之心哉惟予之  
顏豈惟今厚將恐來世以予為口實庚戌宇文泰  
酖帝崩

呂東萊大事記及馬端臨文獻通考別本皆云壽十  
六不知何據 愚按帝紀與恭帝紀皆寂寥不足觀  
故取他書益之云

恭皇帝諱廓文皇帝第四子失其母氏大統十四年封

齊王二十四軍建以王為使持節大將軍大都督十六  
年高洋篡東魏安定公宇文泰奉詔討之命王鎮隴右  
廢帝三年正月即皇帝位大赦改元立妃若干氏為皇  
后

元年夏四月帝大饗羣臣庚戌宇文泰弑廢帝及故后  
宇文泰是月柔然山梅連官寇廣武五月柱國李弼追  
擊之斬首數千級收輜重而還冬十一月師滅梁戕梁  
孝元帝梁太尉王僧辯奉孝元子方智為王承制居建

業

二年春正月冊梁王蕭瑒為梁皇帝

歷代三寶記曰是年三月送梁國圖籍墳典至長安  
秋七月梁太尉王僧辯納貞陽侯蕭淵明於齊奉以為  
主立梁王方智為太子九月梁司空陳霸先殺僧辯廢  
蕭淵明復奉方智為帝是歲梁廣州刺史王琳寇邊大  
將軍豆盧寧帥師討之

資治通鑑曰是年宇文泰諷淮安王育上表請如古

制降爵為公於是宗室諸王皆降為公 是歲梁帝  
紹泰元年後梁宣帝天定元年  
三年春正月丁丑初行周禮建六官

隋書禮儀志載詔曰六樂尚矣聲歌之節舞蹈之容  
寂寥已絕但方行古人之事宜本於茲可制其歌舞  
配日月星辰

以安定公宇文泰為太師大冢宰以柱國李弼為大司  
徒趙貴為太保大宗伯以尚書令獨孤信為大司馬以

干謹為大司寇以侯莫陳崇為大司空冬十月己亥安  
定公宇文泰薨十二月庚子帝遜位於周出居大司馬  
府

是歲梁太平元年

次年正月周氏封帝為宋公二月周冢宰宇文護弑帝  
崩謚曰恭皇帝

愚按大事記文獻通考皆云壽二十二不知何據  
周續封道武後羅為韓公羅卒又改封譙詳廣平王

懷傳

東魏孝靜皇帝

愚按北史別魏而東之明非正也然孝靜賢足取而亡足憐北史不用魏澹魏書例削紀為傳當以此

諱善見清河文宣王亶之世子母胡妃永熙三年八月拜開府儀同三司孝武既入關勃海王高歡乃與百寮會議推世子以奉明帝後時年十一

天平元年冬十月丙寅皇帝即位於城東北大赦改元

庚午以太師趙郡王諶為大司馬以司空咸陽王坦為  
太尉以開府儀同三司高盛為司徒以開府儀同三司  
高昂為司空壬申享太廟

魏書載壬申詔曰安安能遷自古明典是以殷遷八  
城周卜三地隆替無恒事由變通故也高祖孝文皇  
帝式觀乾象俯協人謀發自武州幸茲嵩縣魏雖舊  
國其命維新及正光之季國步孔棘喪亂不已寇賊  
交侵俾我生民無所措手今遠遵古式深驗時事考



龜襲吉遷宅漳溢庶克隆洪基再昌寶厯主者明為  
條格及時發邁

丙子車駕北遷於鄴詔渤海王高歡留後部分改司州  
為洛州以尚書元弼為儀同三司洛州刺史鎮洛陽十  
一月兗州刺史樊子鵠南青州刺史大野拔據瑕丘反  
庚寅車駕至鄴

魏徵隋書食貨志曰東魏遷都于鄴出粟一百三十  
萬石以賑窮民

居北城相州之解改相州刺史為司州牧魏郡太守為  
魏尹徙鄴舊人西徑百里以居新遷人分鄴置臨漳縣  
以魏郡林慮廣平陽丘汲郡黎陽東濮陽清河廣宗等  
郡為皇畿十二月丁卯燕郡王賀拔允薨庚午詔內外  
解嚴百司悉依舊章從容雅服不得以衿衫從事丙子  
進侍中封隆之等五人為大使巡喻境內丁丑赦畿內  
閏月梁以元慶和為魏王入據平瀨鄉宇文泰弒孝武  
於長安初置四中郎將於礪石橋置東中蒲泉置西中

濟北置南中洛水置北中

三年春正月己亥無尚書右僕射東南道行臺元宴討  
元慶和破走之二月壬午以太尉咸陽王坦為太傅以  
司州牧西河王悰為太尉己丑前南青州刺史大野拔  
斬樊子鵠以降兗州平戊戌梁司州刺史陳敬之寇豫  
州刺史堯雄擊走之三月辛酉以司徒高盛為太尉以  
司空高昂為司徒濟陰王暉業為司空渤海王高歡討  
平山胡劉彘升辛未以旱故詔京邑反諸州郡縣收瘞

骸骨夏四月前青州刺史侯梁反攻掠青齊癸未濟州  
刺史蔡儁討平之壬辰降京師見囚夏五月大旱勒城  
門殿門及省府寺署坊門澆人不簡王公無限日得雨  
乃止六月元慶和寇南頓豫州刺史堯雄大破之秋七  
月甲戌封汝南王悅孫綽為瑯琊王八月辛卯司空濟  
陰王暉業坐事免甲午發衆七萬六千人營新宮九月  
丁巳以開府儀同三司襄城王旭為司空冬十月丁未  
梁柳仲禮寇荊州刺史王元擊破之癸丑祀圓丘甲寅

閭闔門災龍見并州中十二月壬午車駕狩於鄴東甲午文武百官量事各給祿是歲高麗契丹國並遣使朝貢於西魏為文皇帝大統元年

三年春正月癸卯朔饗羣臣於前殿戊申詔百官舉士舉不稱才者兩免之二月丁未梁光州刺史郝樹以州內附丁酉加渤海王世子高澄為尚書令大行臺大都督三月甲寅以開府儀同三司華山王鷟為大司馬丁卯陽夏太守盧公纂據郡南叛大都督元整破之夏四

月丁酉昌樂王謚薨五月癸卯賜鰥寡孤獨貧窮者各有差丙辰以錄尚書事西河王恂為司州牧戊辰太尉高盛卒六月卒己趙郡王謚薨秋七月庚子大赦梁夏州刺史田獨鞏頡川防城都督劉鸞慶並以州內附八月并肆涿建四州霜霰大饑九月壬寅以定州刺史侯景兼尚書右僕射南道行臺節度諸軍南討丙辰平陽人路季禮聚衆反辛酉御史中尉竇泰討平之冬十一月戊申詔遣使巡檢河北流移饑民侯景攻剋梁楚州

獲刺史恒和十二月以并州刺史尉景為太保辛未遣使者板假老人官百歲以下各有差壬寅皇生父太司馬清河王亶薨癸未以太傅咸陽王坦為太師是歲高麗勿吉並遣使朝貢

四年春正月以汝陽王暹為錄尚書事夏四月辛未遷七帝神主於新廟大赦

溫子昇集載詔曰朕瞻言往事取則前脩乃襲去鄴用追遷鄴今清廟初興闕宮始就靈祇萃止祖考來

格神光夜照香氣朝聞今日吉辰躬展誠敬時和氣  
婉景麗雲柔四表來廷萬國在位哀樂相交感慶交  
集固宜觀象雷雨布寬大之恩取類澤風申肆眚之  
令可大赦天下 愚按資治通鑑注以道武明元太  
武文成獻文孝文宣武為七帝而高歡既推帝以奉  
孝明後豈有子不祀父禮恐七帝乃八帝之誤

內外百官普進一階先是滎陽人張儉等聚衆反於大  
駝山通西魏壬辰武衛將軍高元咸討破之六月己巳



幸華林園理訟辛未詔尚書掩骼埋胔推錄囚徒壬午  
閭闔門災秋七月甲辰遣兼散騎常侍李楷聘於梁八  
月西魏剋陝州刺史李徽伯死之九月侍中元子思與  
其弟謀西入並賜死閏月己丑衛將軍右光祿大夫蔣  
天樂謀反伏誅禁京師沽酒冬十月以咸陽王坦為錄  
尚書事壬辰渤海王高歡西侵敗於沙苑己酉西魏行  
臺龔景壽都督楊白駒寇洛州大都督韓賢大破之西  
魏又遣其大行臺元季海大都督獨孤信逼洛州刺史

廣陽王湛棄城歸闕季海信遂據金墉十一月丙子以  
驃騎大將軍儀同三司万俟普為太尉十二月甲辰梁  
人來聘河間人邢磨納范陽人盧仲禮各聚衆反是歲  
高麗柔然並遣使朝貢

元象元年春正月辛酉朔日有蝕之有巨象自至碭郡  
陂中南兗州獲送於鄴丁卯大赦改元二月丙辰遣兼  
散騎常侍鄭伯猷聘於梁夏四月庚寅曲赦畿內開酒  
禁六月壬辰帝幸華林都堂聽訟是夏山東大水蝦蟇

鳴於樹上秋八月辛卯勃海王高歡大敗西魏於河陰  
九月大都督賀拔仁擊邢磨納盧仲禮等破平之冬十  
月梁人來聘十二月庚寅遣陸操聘於梁

段成式酉陽雜俎曰魏使操等聘於梁入樂遊苑西  
門內青油幕下梁武備三仗乘輿從南門入操等東  
面再拜梁武北入臨光殿坐皂帳南面諸賓及羣官  
俱坐定遣中書舍人殷靈宣旨慰勞具有辭答又  
曰操至梁梁武坐小輿使再拜宣旨勞問至重雲殿

引昇殿梁武着菩薩衣北面太子已下皆菩薩衣侍  
衛如法一道人贊禮佛辭凡三卷其贊第三卷中稱  
為魏主魏相高并南北二境士女禮佛訖操與其羣  
臣俱再拜

是歲高麗遣使朝貢

興和元年春正月辛酉以尚書令孫騰為司徒三月甲  
寅朔封常山郡王邵第二子曜為陳郡王五月甲戌立  
皇后高氏乙亥大赦六月乙酉以尚書左僕射司馬子

如為山東黜陟大使尋為東北道行臺差選勇士庚寅  
前潁川刺史奚忠業為河南大使簡發勇士丁酉梁人  
來聘戎申開府儀同三司汝陽王暹薨秋八月壬辰遣  
無散騎常侍王元景聘於梁九月甲子發畿內十萬人  
城鄴四十日罷辛未曲赦畿內死罪已下各有差冬十  
一月癸亥以新宮成大赦改元八十以上賜綾帽及杖  
七十旁無期親及有疾廢者各賜粟帛築城之夫給復  
一年是年高麗遣使朝貢

八月庚戌以開府儀同三司吏部尚書侯景為兼尚書僕射河南行臺隨機討防冬十月甲寅梁人來聘十一月壬午驃騎大將軍開府儀同三司青州刺史西河王怛薨十二月辛亥遣兼散騎常侍陽裴使於梁是歲柔然高麗吐谷渾並遣使朝貢

武定元年春正月壬戌朔大赦改元己巳車駕蒐於邯鄲之西山癸酉還宮二月壬申北豫州刺史高仲密據虎牢西叛西魏丞相宇文泰率衆來援三月丙午帝親

納訟甲申勃海王高歡大敗西魏於邙山追奔至恒農  
而還豫洛二州平夏四月封彭城王韶弟襲為武安王  
五月壬寅以剋復虎牢降死罪以下囚己未以吏部尚  
書侯景為司空六月己亥梁人來聘戊寅封前員外散  
騎侍郎元長春為南郡王八月己丑以汾州刺史斛律  
金為大司馬壬午遣無散騎常侍李渾聘於梁冬十一  
月甲午車駕狩於西山己還宮是歲吐谷渾柔然高  
麗並遣使朝貢

二年春二月丁卯徐州人劉烏黑聚衆反遣行臺慕容  
紹宗討平之三月梁人來聘以旱故宥死罪已下囚丙  
午以開府儀同三司孫騰為太保壬子以勃海王世子  
高澄為大將軍文武職事賞罰衆典皆稟於澄以領中  
書監元弼為錄尚書事以尚書左僕射司馬子如為尚  
書令以太原公高洋為左僕射夏五月甲午遣散騎常  
侍魏季景聘於梁丁酉太尉廣陽王湛薨秋八月癸酉  
尚書令司馬子如坐事免九月甲申以開府儀同三司



濟陰王暉業為太尉太師咸陽王坦坐事免以王還第  
冬十月丁巳太保孫騰大司馬高隆之各為括戶大使  
凡獲逃戶六十餘萬十一月西河地陷有火出甲申以  
司徒高隆之為尚書令以前大司馬婁昭為司徒庚子  
祀圓丘辛丑梁人來聘是歲吐谷渾地豆干室韋高麗  
柔然勿吉等國並遣使朝貢

三年春正月丙申遣兼散騎常侍李獎聘于梁二月庚  
申吐谷渾國奉其從妹以備後庭納為容華嬪夏五月

甲辰大赦秋七月庚子梁人來聘

隋書五行志曰九月豹入鄴城南門格殺之

冬十月遣中書舍人尉瑾聘於梁十二月以司空侯景  
為司徒以中書令韓軌為司空戊子以太保孫騰為錄  
尚書事是歲高麗吐谷渾柔然並遣使朝貢

四年夏五月梁人來聘六月庚子以司徒侯景為河南  
大行臺應機討防秋七月壬寅遣兼散騎常侍元廓聘  
于梁八月移洛陽漢魏石經于鄴

魏書曰九月勃海王高歡攻西魏玉壁不克冬十一月以疾班師 隋書五行志曰是年冬大霧六日晝夜不解占為陰侵陽臣將侵君之象此明年元瑾劉思逸謀殺大將軍之應 愚按此乃明年大將軍高澄詈辱君父跋扈不臣之應而史反以為元瑾等奉詔討澄等所感召大謬

隋書五行志又云武定五年秋大雨七十餘日亦元瑾謀殺大將軍之應其謬同

是歲室韋勿吉地豆干高麗柔然並遣使朝貢

五年春正月己亥朔日有蝕之丙午勃海王高歡薨辛亥司徒侯景降于西魏以求救西魏遣其將李弼王思政赴之思政等人據潁川景乃出走豫州己丑梁人來聘二月侯景復背西魏歸梁夏四月壬申大將軍高澄來朝甲午遣兼散騎常侍李緯聘於梁五月丁酉朔大赦戊戌以尚書右僕射襄城王旭為太尉甲辰以太原公高洋為尚書令領中書監以青州刺史尉景為大司

馬以開府儀同三司庫狄干為太師以錄尚書事孫騰  
為太傅以汾州刺史賀拔仁為太保以司空韓軌為司  
徒以領軍將軍可朱渾道元為司空以司徒高隆之錄  
尚書事以徐州刺史慕容紹宗為尚書左僕射高陽王  
斌為右僕射戊午大司馬尉景卒六月己酉帝為故勃  
海王高歡舉哀于東堂服總衰秋

魏書載七月以大將軍高澄都督中外諸軍錄尚書  
事甲申葬勃海獻武王於鄴城西北車駕祖于漳濱

通鑑曰八月壬辰帝以大將軍高澄無禮密詔尚書祠部郎中元瑾侍讀荀濟長秋卿劉思逸淮南王宣洪華山王大器濟北王徽等共誅之事池反為所害幽帝于宮中 隋書五行志曰是月豹上銅雀臺九月辛丑梁貞陽侯蕭淵明寇徐州堰泗水於寒山灌彭城以應侯景冬十一月己酉以尚書左僕射慕容紹宗為東南道行臺與大都督高岳潘相樂大破擒之及其二子瑀道十二月己未蕭淵明至帝御閭闔門受俘

金史卷一百一十五  
讓而宥之岳等廻師討侯景是歲高麗勿吉並遣使朝貢

是歲梁太清元年

六年春正月己亥大都督高岳等大破侯景於渦湯俘斬五萬餘人餘溺死於渦水水為不流景走淮南二月己卯梁遣使求和許之三月癸巳以太尉襄城王旭為大司馬以開府儀同三司高岳為太尉辛亥以冬春亢旱赦罪人各有差夏四月甲子吏部令史張永和青州

人崔閼等偽假人官事覺紕檢首者六萬餘人甲戌以  
尚書左僕射慕容紹宗為大行臺與太尉高岳司徒韓  
軌大都督劉豐等討王思政於潁川引洧水灌其城九  
月己酉梁人來聘冬十月戊申侯景濟江推梁臨賀王  
正德為主以攻建業是歲高麗室韋柔然吐谷渾並遣  
使朝貢

七年春正月戊辰梁北徐州刺史中山侯蕭正表以鎮  
內附封蘭郡公吳郡王三月丁卯侯景剋建業夏四月



大行臺慕容紹宗遇暴風溺水死五月丙辰梁武帝殂  
戊寅大將軍高澄帥師赴潁川六月剋之獲西魏大將  
軍王思政等秋七月大將軍高澄至自潁川帝宴澄及  
諸將於華林園八月辛卯立皇子長仁為皇太子大將  
軍高澄為蘭京所殺

本史書盜賊勃海王高澄今正之辨見後

癸巳大赦內外百官並進二級甲午太原公高洋如晉  
陽冬十月癸未以開府儀同三司咸陽王坦為太傅甲

午以開府儀同三司潘相樂為司空十二月甲辰吳郡王蕭正表薨以并州刺史彭樂為司徒是歲柔然地豆干室常高麗吐谷渾並遣使朝貢

八年春正月辛酉帝為勃海王高澄舉哀於東堂戊辰詔太原公高洋嗣事徙封齊郡王甲戌地豆干契丹並遣使朝貢二月

魏書曰甲申葬勃海文襄王車駕祖於漳濱

庚寅以尚書令高隆之為太保三月庚申進齊郡王高

洋爵為齊王夏四月己巳桑然遣使朝貢五月甲寅詔齊王為相國總百揆備九錫之禮以齊國太妃為王太后王妃為王后丙辰遜帝位于齊己未齊氏封帝為中山王邑一萬戶上書不稱臣答不稱詔載天子旌旗行魏正朔乘五時副車封王諸子為縣公邑各一千戶奉絹一萬尺錢一萬貫粟二萬石奴婢三百人水碾一具田百頃園一所於中山國立魏宗廟次年十二月己酉齊王高洋弒帝崩時年二十八

天保三年二月奉謚曰孝靜皇帝葬於鄴西漳北後忽命發之陵崩死者六十人

資治通鑑曰拔梓宮於漳水 宋揮塵錄曰太祖乾德四年詔禁樵採禁空陵耶抑後有收而葬之如符堅於石虎耶

帝好文美容儀力能挾石獅子以踰牆射無不中嘉辰宴會多命羣臣賦詩從容沉雅有孝文風

資治通鑑曰始獻武王歡自病逐君之醜事帝禮甚

恭事無大小必以聞可否聽之每侍宴俯伏上壽帝  
設法會乘輦行香歡執香爐步從鞠躬屏氣承望顏  
色故其下奉帝莫敢不恭

渤海王高澄副事甚忌焉以大將軍中兵叅軍崔季舒  
為中書黃門侍郎令監察動靜大小皆令季舒知澄與  
季舒書曰癡人復何似癡聾小差未宜用心檢校帝嘗  
與澄獵於鄴東馳逐如飛監衛都督烏那羅受工伐從  
後呼帝曰天子莫走馬大將軍怒澄嘗侍帝飲大舉觴

曰臣澄勸陛下帝不悅曰自古無不亡之國朕亦何用  
此生為澄怒曰朕朕狗脚朕使季舒啟帝三拳奮衣而  
出明日澄使季舒勞帝帝亦謝焉賜絹季舒未敢受以  
啟澄澄使取一段帝束百疋與之曰亦一段爾帝不堪  
憂辱詠謝靈運詩曰韓亡子房奮秦帝魯連恥本自江  
海人忠義動君子常侍侍講荀濟知帝意乃與華山王  
大器元瑾等密謀於宮中偽為山而作地道向北城至  
千秋門門者覺地下響動以告澄澄勒兵入宮不拜而

坐曰陛下何意反耶臣父子功存社稷何負陛下耶此  
必妃嬪輩所為欲殺胡夫人及李嬪帝正色曰自古惟  
聞臣反君不聞君反臣王自欲反何關於我我殺王則  
社稷安不殺則社稷危身且不暇惜何況妃嬪必欲弑  
逆緩速在王

愚按澄勒兵入宮以下本史所刪甚多情事與語意  
俱晦今改依資治通鑑云

澄乃下牀叩頭大啼謝罪於是酣飲夜久乃出居三日

幽帝於含章堂大器元瑾等皆烹於市及將禪文宣襄  
城王昶司徒潘相樂侍中張亮黃門郎趙彥深等求入  
奏事帝在昭陽殿見之昶曰五行遽運有始有終齊王  
聖德欽明萬姓歸仰願陛下則堯禪舜帝便歛容答王  
此事推挹已久謹當遜避又云若爾須作詔書侍郎崔  
劼裴讓之奏云詔已作訖即付楊愔進帝凡十條書訖  
曰將安朕何所復若為而去愔對曰在北城別有館宇  
還備法駕依常仗衛而去帝乃下御座步就東廊口詠



范蔚宗後漢書贊云獻生不辰身播國屯終我四百永  
作虞賓所司奏請發帝曰古人念遺簪敝屣欲與六宮  
別可乎高隆之曰今天下猶陛下之天下沉在後宮乃  
步入與夫人嬪以下訣莫不歔歔掩涕嬪趙國李氏誦  
陳思王詩王其愛玉體俱享黃髮期自皇后已下皆哭  
直長趙德以故犢車一乘候於東上閤帝上車德超上  
車持帝帝肘之曰朕畏天順人授位相國何物奴敢逼  
人德尚不下

三國典畧曰大將軍高澄攻王思政於潁川親坐所築土山堰上趙道德引其裾使下曰箭頭有鏃不避大王已箭果集澄坐之所資治通鑑曰常山王演欲廢少主殷自立以諸臣勸進語白於太皇太后趙道德曰相王不學周公輔成王而欲骨肉相奪獨不畏後世謂之篡耶太皇太后是之愚按趙道德忠於澄若彼忠於少主殷以拒演又若此獨無禮於孝靜耶不知資治通鑑何據乃改趙德為趙道德綱目

亦然一耶二耶學人再考之

及出雲龍門王公百僚衣冠拜辭帝曰今日不減道鄉  
公漢獻帝衆皆悲愴高隆之泣灑

愚按本史裴讓之傳云帝與羣臣別讓之獨流涕歔  
歔何以不載

遂入北城下司馬子如南宅初帝禪位前一月有禾生  
於銅研旦長數寸有穗識者以為忝離之感云及文宣  
行幸嘗以帝自隨帝后封太原公主常為帝嘗食以護

視焉竟遇酖而崩

資治通鑑曰齊王飲公主酒使人酖王殺之并其子

論曰莊帝運接交喪招納勤王雖時事孔棘而卒有四  
海猶逆剪除權奸擅命神慮獨斷芒刺幸除而天未忘  
亂禍不旋踵

魏書曰未聞長轡之策遽深負刺之恐謨謀罕術授  
任乖方猜嫌行僂禍不旋踵 愚按魏收此論甚謬

蓋以袒高歡者袒尔朱榮以詆孝武者詆孝莊也  
自茲之後魏室土崩始則制屈強胡終乃權歸霸政主  
祭祀者不殊於寄坐遇黜辱者有甚於奕棋雖以節閔  
之明孝武之長

魏書曰平陽猜惑自絕宗廟悖德為甚 愚按猜惑  
悖德四字收專為媚高氏而言若帝之罪在弑君淫  
妹此非其實

祇以速是奔波文帝以剛強之質終以守雌自寶

廢帝圖權自禍君子哀其志焉

靜恭運終天祿皆不保其身悲夫

隋翻經學士費長房作歷代三寶記以道武以下都  
平城者為北魏孝文以下都洛陽者為南魏孝武以  
下都長安者為西魏孝靜都鄴為東魏共成東西南  
北四魏云

南北史合注卷九十一